

ISSN 2831-1604



1 9 2 3 - 2 0 2 3

BILTEN

ZAVODA ZA JAVNO ZDRAVSTVO
FEDERACIJE BOSNE I HERCEGOVINE

Broj 4

Sarajevo/Mostar, 2023.



Učešće prim. mr. sc. Siniše Skočibušića, dr. med. na Prvoj nacionalnoj konferenciji o javnom zdravstvu “Zdravlje kao izvor prosperiteta”

Portorož, 3.- 4. 10. 2023. godine

Nacionalni institut za javno zdravstvo Republike Slovenije (NIJZ) organizovao je 3. i 4. oktobra 2023. godine Prvu nacionalnu konferenciju o javnom zdravstvu naziva “Zdravlje kao izvor prosperiteta” u Kongresnom centru Portus, Portorož, Slovenija.

Dr. Skočibušić je govorio o najznačajnijim postignućima Zavoda za javno zdravstvo Federacije Bosne i Hercegovine tokom stogodišnjeg djelovanja u područjima prevencije, očuvanja i unaprjeđenja zdravlja stanovništva, o

javnozdravstvenim prioritetima danas, važnosti međunarodne saradnje i u kojem pravcu bi trebalo usmjeravati djelovanje i aktivnosti javnozdravstvenih institucija u budućem periodu.

Dvodnevni naučno-stručni skup, na kojem su predstavljeni primjeri uspješnih praksi i izazovi javnog zdravstva, okupio je vodeće stručnjake iz javnog zdravstva, predstavnike zdravstvenih ustanova, civilnog društva, javne uprave i poslovnog sektora iz Slovenije i regije.



Prof. dr. sc. Aida Ramić-Čatak, dr. med. - heroina mjeseca Ambasade Sjedinjenih Američkih Država u Bosni i Hercegovini

Sarajevo, 4. 10. 2023. godine

Pomoćnica direktora za medicinske poslove, voditeljica Sektora javnog zdravstva Zavoda za javno zdravstvo Federacije Bosne i Hercegovine i federalna koordinatorica za kontrolu duhana pri Federalnom ministarstvu zdravstva prof. dr. sc. Aida Ramić Čatak, dr. med. proglašena je heroinom mjeseca Ambasade Sjedinjenih Američkih Država u Bosni i Hercegovini.

Ovo priznanje joj je dodijeljeno za dvadesetogodišnje nesebično zalaganje i rad u javnom zdravstvu u Bosni i Hercegovini, posebno u oblasti kontrole duhana, čiji je rad i zalaganje doveo do zakona koji će ograničiti pušenje na javnim mjestima i u blizini djece, što će zasigurno doprinijeti i unaprjeđenju respiratornog zdravlja svih građana u Bosni i Hercegovini.



Nastavak edukativnih radionica o uvođenju imunizacije protiv HPV u Federaciji BiH

Livno, 5. 10. 2023. godine

Vakcinacija protiv humanog papiloma virusa (HPV) djevojčica i djevojaka, kao i dječaka i mladića je preporučljiva radi smanjenja rizika od HPV infekcije i njenih štetnih posljedica, naročito određenih karcinoma - istaknuto je tokom pete Edukativne radionice o uvođenju imunizacije protiv HPV u Federaciji Bosne i Hercegovine koja je održana 5. oktobra 2023. godine u Livnu, u organizaciji

Zavoda za javno zdravstvo Federacije Bosne i Hercegovine.

Radionice o uvođenju imunizacije protiv HPV u Federaciji Bosne i Hercegovine namijenjene su zdravstvenim radnicima, a uređuje ih i vodi Zavod za javno zdravstvo Federacije Bosne i Hercegovine u partnerstvu sa Federalnim ministarstvom zdravstva, UNFPA, WHO u BiH, USAID-om i Udrugom Kap.



Edukativna radionica o važnosti prevencije HPV infekcije

Grude, 6. 10. 2023. godine

Vakcinacija protiv humanog papiloma virusa (HPV) štiti za čak 90 posto od raka grlića materice - ključna je poruka šeste Edukativne radionice o uvođenju imunizacije protiv HPV

u Federaciji Bosne i Hercegovine koja je održana u Grudama 6. oktobra 2023. godine, u organizaciji Zavoda za javno zdravstvo Federacije Bosne i Hercegovine.



Cilj radionice je, između ostalog, olakšati zdravstvenim radnicima educiranje o važnosti prevencije te aktivniji rad na kampanji usmjerenoj na edukaciju mladih, ali i njihovih roditelja o važnosti vakcinacije protiv HPV.



Zavod za javno zdravstvo Federacije BiH će, zajedno sa partnerima, nastaviti provoditi radionice širom Federacije Bosne i Hercegovine i u narednom periodu.



Svjetski dan mentalnog zdravlja
10.listopad/oktobar



100 ZAVOD ZA JAVNO ZDRAVSTVO FBiH
INSTITUTE FOR PUBLIC HEALTH FBiH
1923 - 2023



Prim. mr. sc. Siniša Skočibušić, dr. med. u posjeti predsjednici Federacije BiH Lidiji Bradara

Sarajevo, 11. 10. 2023. godine

Direktor Zavoda za javno zdravstvo Federacije Bosne i Hercegovine prim. mr. sc. Siniša Skočibušić, dr. med. posjetio je 11. oktobra 2023. godine predsjednicu Federacije Bosne i Hercegovine Lidiju Bradara u njenoj kancelariji u Sarajevu. Tokom susreta razgovarali su o mnogobrojnim temama iz područja javnog zdravstva

te o modalitetima i rješenjima koja bi unaprijedila zdravstveni sistem, učinila ga efikasnijim i u kojem bi pacijenti bili zadovoljniji.

Razgovarano je i o organizacijskoj strukturi i redovnim aktivnostima Zavoda za javno zdravstvo FBiH, a predsjednica Bradara je prihvatila poziv na proslavu 100 godina

institucionalnog javnog zdravstva u Bosni i Hercegovini koju organizuje Zavod za javno

zdravstvo Federacije BiH 17. oktobra u Sarajevu.



Saradnja Zavoda za javno zdravstvo Federacije Bosne i Hercegovine i Katoličkog tjednika

Sarajevo, 11. 10. 2023. godine

Direktor Zavoda za javno zdravstvo Federacije Bosne i Hercegovine prim. mr. sc. Siniša Skočibušić, dr. med. razgovarao je 11. oktobra 2023. godine s glavnim urednikom Katoličkog tjednika vlč. Josipom Vajdnerom o pravcima buduće saradnje Zavoda i ovog medija koji djeluje unutar Medijskog centra Vrhbosanske nadbiskupije.

Dr. Skočibušić je istakao da će Zavod za javno zdravstvo Federacije Bosne i Hercegovine nastaviti biti otvoren za širenje informacija o svojim redovnim aktivnostima i izazovima u radu te se zahvalio Katoličkom tjedniku na

spremnosti da pruži medijsku podršku vodećoj stručnoj, istraživačkoj i nastavnoj ustanovi iz oblasti javnog zdravstva.

Dogovoreno je da će stručnjaci Zavoda za javno zdravstvo Federacije Bosne i Hercegovine pisati članke i davati intervjuje Katoličkom tjedniku i jednostavnim i lako razumljivim rječnikom čitaocima kontinuirano približavati teme kao što su faktori rizika za zdravlje, fizička aktivnost, ishrana i zdravlje, mentalno zdravlje, zarazne i nezarazne bolesti, imunizacija, okoliš i zdravlje i druge javnozdravstvene teme.





Obilježavanje Mjeseca borbe protiv raka dojke

Sarajevo/Mostar, oktobar 2023. godine

Uposlenici Zavoda za javno zdravstvo Federacije BiH – poslovne jedinice Mostar i Sarajevo te Centra za zaštitu od zračenja organizovali su u petak, 13. 10. 2023. godine kolektivno fotografisanje sa ružičastim trakama kako bi na simboličan način, u vrijeme obilježavanja Mjeseca borbe protiv raka dojke, zajedno iskazali podršku oboljelima od ove bolesti.

Mjesec ružičastih traka – oktobar, svake godine podsjeća na važnost redovnih mamografskih i ultrazvučnih kontrola, odnosno rane



dijagnostike i pravovremenog liječenja osoba oboljelih od raka dojke, kako bi stopa obolijevanja i smrtnost od ove zloćudne bolesti bila što manja.



Posjeta Biblioteci za slijepa i slabovidna lica u BiH

Sarajevo, 11. 10. 2023. godine

Predstavnica Službe za promociju zdravlja Zavoda za javno zdravstvo Federacije BiH dr. Elvedina Žiga, posjetila je 13. oktobra 2023. godine Biblioteku za slijepa i slabovidna lica u BiH sa sjedištem u Sarajevu. Prilikom posjete, direktoru Biblioteke g. Sakibu Plehu dostavljeni su vodiči, leci i drugi edukativni materijali Zavoda, koji bi služili kao osnova za izradu tematskih bibliotekskih jedinica o očuvanju zdravlja i prevenciji različitih bolesti, korištenjem tehnika za slijepa lica.

Sastanak je, između ostalog, bio prilika za predstavljanje važnosti imunizacije protiv HPV

(Humanog papilloma virusa) – uz štampane materijale Zavoda, odnosno zaštite zdravlja djevojčica i djevojaka od raka grlića materice pomoću imunizacije te dostupnosti odgovarajućih materijala za informisanje slijepih i slabovidnih lica.





Zdravstveno statistički godišnjak Federacije Bosne i Hercegovine za 2022. godinu

Sarajevo/Mostar, oktobar 2023. godine

Zavod za javno zdravstvo Federacije Bosne i Hercegovine, u sklopu svojih redovnih aktivnosti, svake godine objavljuje „Zdravstveno statistički godišnjak Federacije Bosne i Hercegovine“. Izdanje za 2022. godinu stručnoj i široj javnosti predstavljeno je sredinom oktobra 2023. godine, uz poseban prilog povodom 100 godina institucionalnog javnog zdravstva u Bosni i Hercegovini.

Godišnjak sadrži zdravstveno-statističke

podatke prikupljene kroz redovni sistem zdravstvene statistike od nivoa zdravstvenih ustanova, preko kantonalnih zavoda za javno zdravstvo do Zavoda za javno zdravstvo Federacije BiH.

Svim građanima, osim štampanog, dostupno je i online izdanje Zdravstveno statističkog godišnjaka Federacije Bosne i Hercegovine, koje se može pronaći na zvaničnom sajtu Zavoda za javno zdravstvo Federacije BiH.





Svjetski dan hospicija i palijativne skrbi 14.oktobar/listopad

100 100th Anniversary of the
Institute for Public Health of FBiH

Svjetski dan pranja ruku 15.oktobar/listopad



100 100th Anniversary of the
Institute for Public Health of FBiH

16.oktobar/listopad 2023.

Svjetski dan hrane

VODA

JE ŽIVOT
JE HRANA

NE OSTAVLJAJMO
NIKOG IZA SEBE

Food and Agriculture
Organization of the
United Nations

100 100th Anniversary of the
Institute for Public Health of FBiH

U OVOM BROJU IZDVAJAMO:

Svečanom akademijom i prijemom u Sarajevu obilježeno 100 godina institucionalnog javnog zdravstva u Bosni i Hercegovini

Sarajevo, 17. 10. 2023. godine

Zavod za javno zdravstvo Federacije Bosne i Hercegovine organizovao je svečanu akademiju naziva “Stoljeće javnozdravstvenih izazova: javno zdravstvo – nekad i sad” u povodu obilježavanja 100 godina institucionalnog javnog zdravstva u Bosni i Hercegovini 17. oktobra 2023. godine u Hotelu Evropa, biseru austrougarske hotelijerske kulture u Sarajevu.

Na jednom mjestu okupili su se predstavnici relevantnih domaćih i regionalnih ustanova i organizacija koje su svojim djelovanjem značajno doprinijeli i doprinose očuvanju i unaprjeđenju javnog zdravlja. Uz njih, svečanosti su prisustvovali i predstavnici vlasti svih nivoa u BiH te mnogobrojni drugi uvaženi i dragi gosti, bivši i sadašnji uposlenici i prijatelji Zavoda.

Bio je to povod za prisjećanje na najznačajnija postignuća stogodišnjeg djelovanja Zavoda u

područjima prevencije, očuvanja i unaprjeđenja zdravlja stanovništva i prilika da se ukaže na javnozdravstvene prioritete te predstave planovi za djelovanje Zavoda u narednom periodu.

Tokom svečane akademije „100 godina institucionalnog javnog zdravstva u Bosni i Hercegovini 1923-2023. – Stoljeće javnozdravstvenih izazova: javno zdravstvo nekad i sad“, Zavod za javno zdravstvo Federacije Bosne i Hercegovine je partnerima dodijelio zahvalnice za doprinos, saradnju i podršku Zavodu za javno zdravstvo Federacije Bosne i Hercegovine u jačanju institucionalnog javnog zdravstva.

Nakon svečane akademije, za goste iz inostranstva je organizovan obilazak uže jezgre Sarajeva uz stručnog vodiča, a za sve goste i svečani prijem u Bečkoj kafani Hotela Evropa.





Zavod za javno zdravstvo Federacije Bosne i Hercegovine unaprijedio hladni lanac Haier monitoring sistemom

Mostar, oktobar 2023. godine

Zavod za javno zdravstvo Federacije Bosne i Hercegovine unaprijedio je hladni lanac Haier monitoring sistemom za kontinuirani monitoring zahtijevanog temperaturnog režima za skladištenje vakcina u Federaciji Bosne i Hercegovine.

Haier monitoring sistem, koji je obezbijedio UNICEF BiH, omogućava:

1. Praćenje temperaturnih promjena u hladnom lancu
2. Pohranjivanje podataka na serveru proizvođača
3. Primanje obavijesti putem poruke (mobilni uređaj) ili email-a o nenormalno visokim/niskim temperaturnim iskanjima iz

zahtijevanog temperaturnog režima, otvaranje vrata, nestanak struje i drugog kvara opreme u hladnom lancu

4. Pomaže korisnicima u analizi i praćenju temperaturnih uslova skladištenja proizvoda kroz veliki broj temperaturnih izvještaja.

Haier monitoring sistemom su opremljene i hladne komore u Zavodu za javno zdravstvo HNŽ i Zavodu za javno zdravstvo SBK. U planu je u budućnosti, ukoliko bude dodatnih donatorskih sredstava, obezbijediti ovaj monitoring sistem svim kantonalnim zavodima za javno zdravstvo i zdravstvenim ustanovama sa vakcinalnim punktovima.



Edukativnim predavanjem obilježen Svjetski dan osteoporoze 2023.

Sarajevo, 20. 10. 2023. godine

Zavod za javno zdravstvo Federacije BiH, u saradnji sa Centrom za promociju i unaprjeđenje zdravlja Općine Stari Grad u Sarajevu, organizovao je 20. 10. 2023. godine u vijećničkoj sali Općine Stari Grad edukativno predavanje u povodu obilježavanja Svjetskog dana osteoporoze. Tom prilikom naglašeni

su načini njene prevencije, rane dijagnostike i održavanja zdravih životnih stilova, kako bi se spriječio invaliditet i unaprijedilo zdravlje i kvalitet života starije populacije. Predavanje sugrađanima treće životne dobi održala je dr. Elvedina Žiga iz Službe za promociju zdravlja Zavoda za javno zdravstvo Federacije BiH.



Edukativna radionica o uvođenju imunizacije protiv HPV u Federaciji Bosne i Hercegovine održana u Bihaću

Bihać, 25. 10. 2023. godine

Zavod za javno zdravstvo Federacije Bosne i Hercegovine organizovao je 25. oktobra 2023. godine u Bihaću sedmu Edukativnu radionicu o uvođenju imunizacije protiv HPV u Federaciji BiH, namijenjenu zdravstvenim radnicima koji rade na imunizaciji u Unsko-sanskom kantonu.

Riječ je o serijalu edukativnih radionica - aktivnostima u organizaciji Zavoda za javno zdravstvo Federacije BiH, u saradnji sa Federalnim ministarstvom zdravstva i domaćim i

međunarodnim partnerima. Radionici je prisustvovao veliki broj zdravstvenih radnika, doktora i medicinskih sestara koji rade direktno sa roditeljima u Unsko-sanskom kantonu. Cilj radionica je podijeliti znanje o humanom papiloma virusu, velikom javnozdravstvenom izazovu i uzročniku velikog broja oboljenja - prvenstveno karcinoma grlića materice te unaprijediti znanje o značaju preventivnih programa.





Mjerenje kvaliteta zraka zatvorenog prostora u vrtićima u Federaciji Bosne i Hercegovine

Sarajevo, 26. 10. 2023. godine

U saradnji sa UNICEF BiH, Zavod za javno zdravstvo Federacije BiH u novembru i decembru provodi projektnu aktivnost vezanu za mjerenje kvaliteta zraka zatvorenog prostora u 8 vrtića na području Kantona Sarajevo (3), Tuzlanskog (3) i Zapadnohercegovačkog kantona (2). Istraživanje ima za cilj sticanje uvida u kvalitet zraka zatvorenog prostora u odabranim vrtićima, koji će služiti kao osnova za donošenje i provođenje relevantnih preventivnih mjera i podizanje nivoa znanja nastavnog osoblja, roditelja i djece, kao i šire vrtićke zajednice o značaju čistog

zraka u prevenciji respiratornih oboljenja. U prostorijama Zavoda za javno zdravstvo Federacije BiH je u četvrtak, 26. 10. 2023. godine održana edukativna radionica na kojoj su članovi radnog tima upoznati sa principima rukovanja mobilnom opremom za mjerenje polutanata zraka zatvorenog prostora. Obuku je proveo predstavnik firme od koje je nabavljena oprema potrebna za provođenje navedene projektne aktivnosti, a mjerenje će vršiti predstavnice Službe za promociju zdravlja Zavoda za javno zdravstvo Federacije BiH.



Održana konferencija „4. Dani Infrastrukture prostornih podataka Federacije Bosne i Hercegovine“

Neum, 26. i 27. 10. 2023. godine

Konferencija „4. Dani Infrastrukture prostornih podataka Federacije Bosne i Hercegovine“ održana je u Neumu 26. i 27. 10. 2023. godine, u organizaciji Federalne uprave za geodetske i imovinsko-pravne poslove, koordinacionog tijela Infrastrukture prostornih podataka u Federaciji BiH.

Konferencija je predstavljala jedinstvenu priliku za okupljanje svih značajnih učesnika u području infrastrukture prostornih podataka u Federaciji BiH te forum za razgovor, razmjenu mišljenja i iskustava, kao i pregled trenutnog napretka na ovom polju. Za učesnike je pripremljen zanimljiv i stručan program

konferencije koji je podijeljen u dva radna dana te organizovan u četiri sesije, sa ukupno 20 izuzetnih predavača koji predstavljaju javni, privatni i akademski sektor.

Cilj uspostave Infrastrukture prostornih podataka je stvoriti preduslove da se racionalizira prikupljanje prostornih podataka i da se izolovani „otoci podataka“ na svim nivoima standardizuju kako bi ih bilo moguće umrežiti i kvalitetno koristiti.

U ime Zavoda za javno zdravstvo Federacije BiH konferenciji su prisustvovali mr. sci. dr. Šeila Cilović-Lagarija i Neira Čengić, DMS.



Zavod za javno zdravstvo Federacije Bosne i Hercegovine nastavlja Preventivni program rane detekcije slabovidnosti kod djece u Federaciji Bosne i Hercegovine

Sarajevo/Mostar, 28. i 30. 10. 2023. godine

Zavod za javno zdravstvo Federacije Bosne i Hercegovine ove godine provodi Preventivni program rane detekcije slabovidnosti kod djece uzrasta od 4 godine (rođene 2019. godine) u sklopu projekta „Pregledaj-progledaj“. Ovaj skrining program ima za cilj rano/pravovremeno otkrivanje slabovidnosti kod djece, kako bi se preduzele mjere čiji bi krajnji rezultat bila korekcija vida i otklanjanje problema u daljnjem životu djece.

Pregled/skrining vida provodiće stručna

medicinska lica u određenim terminima u vrtićima odnosno u primarnoj zdravstvenoj zaštiti (kod pedijataru) u Federaciji Bosne i Hercegovine do kraja godine, uz primjenu principa dobrovoljnog i informisanog pristanka roditelja/staratelja. Edukacije timova koji će pregledati djecu održane su 28. i 30. oktobra 2023. godine u Organizacionim jedinicama Zavoda za javno zdravstvo Federacije Bosne i Hercegovine u Sarajevu i Mostaru.



U Zenici održana Edukativna radionica o uvođenju imunizacije protiv HPV u Federaciji BiH

Zenica, 31. 10. 2023. godine

Zavod za javno zdravstvo Federacije Bosne i Hercegovine organizovao je 31. oktobra 2023. godine u Zenici osmu Edukativnu radionicu o uvođenju imunizacije protiv HPV u Federaciji Bosne i Hercegovine namijenjenu zdravstvenim radnicima koji rade na imunizaciji u Zeničko-dobojskom kantonu.

Jedan od ključnih elemenata ove radionice je diskusija sa zdravstvenim radnicima koji su

najvjerniji prenosioci dobrih zdravstvenih poruka odnosno podizanja nivoa svjesnosti o prevenciji bolesti, prevenciji karcinoma cerviksa, ali i drugih karcinoma i genitalnih i negenitalnih bradavica koje se javljaju kod velikog broja stanovništva.

Na radionici je predstavljen dosadašnji rad i buduće aktivnosti Zavoda koje će se realizovati ne samo u Zeničko-dobojskom, nego i u drugim kantonima u Federaciji BiH.



Panel-diskusija: Visok stepen pretilosti djece, trebaju se zauzeti svi sektori zajedno

Sarajevo, 1. 11. 2023. godine

Sve je više pretile djece, problem je globalan, a promjene svijesti i navika građana i roditelja, nastavnog osoblja i djece o pravilnoj ishrani neophodne – jedan je od zaključaka panel-

diskusije o pravilnoj ishrani djece kao načinu za zaustavljanje visokog stepena pretilosti u organizaciji Udruženja Moderno društvo, koja je održana 1. novembra 2023. na Trebeviću.

Među učesnicima panel diskusije bila je dr. sc. Aida Filipović Hadžiomerađić, dr. med. - voditeljica Odjela za higijenu i zdravstvenu ekologiju Službe za promociju zdravlja Zavoda za javno zdravstvo Federacije Bosne i Hercegovine, koja je govorila o strategijama vezanim za unaprjeđenje ishrane koje implementira Zavod za javno zdravstvo Federacije BiH. Govorila je također o unaprjeđenju



legislative vezane za ishranu u odgojno-obrazovnim ustanovama i implementaciji standarda i normativa ishrane koje je donijelo Ministarstvo obrazovanja i nauke Federacije Bosne i Hercegovine u saradnji sa Federalnim ministarstvom zdravstva i Zavodom za javno zdravstvo Federacije BiH te o unaprjeđenju javne nabavke hrane i radu na reformulaciji proizvoda.



Edukativna radionica o uvođenju imunizacije protiv HPV u Federaciji Bosne i Hercegovine

Goražde, 2. 11. 2023. godine

Zavod za javno zdravstvo Federacije Bosne i Hercegovine organizovao je 2. novembra 2023. godine u Goraždu devetu Edukativnu radionicu o uvođenju imunizacije protiv HPV u Federaciji Bosne i Hercegovine namijenjenu zdravstvenim radnicima koji rade na imunizaciji u Bosansko-podrinjskom kantonu.

Cilj i ove devete Edukativne radionice bio je informisati i edukovati zdravstvene radnike, posebno učesnike u procesu imunizacije, o



humanom papiloma virusu (HPV) i planu provođenja vakcinacije protiv HPV na području Bosansko-podrinjskog kantona. Dodatni cilj je bio doprinos prevenciji i promociji vakcinacije i unaprjeđenju zaštite zdravlja žena u Federaciji Bosne i Hercegovine.

Na radionici je učestvovalo više od 30 ljekara, medicinskih sestara, specijalista te drugih stručnjaka uključenih u provođenje imunizacije na području BPK Goražde.





Počela vakcinacija protiv sezonske gripe u Federaciji Bosne i Hercegovine

Mostar/Sarajevo, 6. 11. 2023. godine

Zavod za javno zdravstvo Federacije Bosne i Hercegovine je u ponedjeljak, 6. 11. 2023. godine otvorio svoja vrata i pozvao svo zainteresovano stanovništvo, posebno osobe starije životne dobi i osobe sa hroničnim bolestima, da se vakcinišu protiv sezonske gripe.

Zavod je osigurao i distribuisao određenu količinu četverovalentne inaktivirane vakcine protiv sezonske gripe po kantonima u Federaciji Bosne i Hercegovine.

Kao i prethodnih godina, ova vakcina je

besplatna i dostupna za vakcinaciju prvenstveno zdravstvenih radnika u Federaciji Bosne i Hercegovine. Također, određena količina ove vakcine dostupna je besplatno za svo zainteresovano stanovništvo koje spada u prioritetnu grupu za vakcinaciju protiv sezonske gripe.

Svi zainteresovani se mogu vakcinisati svakog radnog dana u periodu 9:00-13:00 sati u Zavodu za javno zdravstvo Federacije Bosne i Hercegovine, u obje organizacione jedinice (OJ Mostar i OJ Sarajevo).



U Mostaru održana deseta edukativna radionica o važnosti vakcinacije protiv HPV infekcije

Mostar, 7. 11. 2023. godine

Zavod za javno zdravstvo Federacije Bosne i Hercegovine organizovao je 7. novembra 2023. godine u Mostaru desetu Edukativnu radionicu o uvođenju imunizacije protiv HPV u Federaciji Bosne i Hercegovine namijenjenu zdravstvenim radnicima koji rade na imunizaciji u Hercegovačko-neretvanskom kantonu.

Cilj desete, završne edukativne radionice, bio je informisati i edukovati zdravstvene radnike o humanom papiloma virusu (HPV) i

planu provođenja vakcinacije protiv HPV na području Hercegovačko-neretvanskog kantona. Dodatni cilj je bio doprinos prevenciji i promociji vakcinacije kao i unaprjeđenju zaštite zdravlja žena u Federaciji Bosne i Hercegovine.

Na radionici je učestvovalo više od 40 ljekara, medicinskih sestara, specijalista te drugih stručnjaka uključenih u provođenje imunizacije na području HNŽ/K.



Predstavnici Zavoda za javno zdravstvo Federacije BiH učestvovali na javnozdravstvenoj konferenciji u Dublinu, Irska

Dublin, 8.- 11. 11. 2023. godine

Fondacija za Evropsku javnozdravstvenu konferenciju, Evropsko društvo za javno zdravstvo (EUPHA) i Švedsko društvo za socijalnu medicinu organizovali su šesnaestu Evropsku javnozdravstvenu konferenciju u Dublinu, Irska, od 8. do 11. novembra 2023. godine.

Kao i prethodnih godina i ovoga puta konferencija je okupila preko 2.300 stručnjaka iz područja javnog zdravstva, zdravstvenih radnika, donosioca odluka, istraživača, specijalizanata i pružaoca zdravstvenih usluga iz svih dijelova Evrope koji su tokom predavanja, panela i

radionica dijelili znanja i iskustva i raspravljali o dosezima i očekivanjima u evropskom javnom zdravstvu i zdravstvenoj zaštiti te izazovima koji se očekuju u narednom periodu.

Tema ovogodišnje konferencije bila je "Naša hrana, naše zdravlje, naša Zemlja: Održiva budućnost za čovječanstvo", a Zavod za javno zdravstvo Federacije Bosne i Hercegovine predstavljali su prim. mr. sc. Siniša Skočibušić, dr. med. - direktor i mr. sc. Šeila Cilović Lagarija, dr. stom. - voditeljica Službe za biostatistiku i informatiku.





Saradnja Zavoda za javno zdravstvo Federacije Bosne i Hercegovine i Instituta za javno zdravlje Srbije „Dr. Milan Jovanović Batut“

Dablin, 8.- 11. 11. 2023. godine

Direktor Zavoda za javno zdravstvo FBiH prim. mr. sc. Siniša Skočibušić, dr. med. susreo se sa direktoricom Instituta za javno zdravlje Srbije „Dr. Milan Jovanović Batut“ prof. dr. Vericom Jovanović tokom šesnaeste Evropske javnozdravstvene konferencije u Dablinu, Irska.

Direktori su razmijenili dosadašnja iskustva, ali i aktuelne izazove s kojima se suočavaju u radu.

U prijateljskom i srdačnom razgovoru

iskazali su obostrani interes za saradnju u budućnosti te najavili potpisivanje Memoranduma o saradnji koji će definisati područja i oblike saradnje ove dvije institucije, posebno na razmjeni informacija i stručnjaka, organizovanju zajedničkih stručnih skupova, učestvovanja na međunarodnim projektima i programima i naučnim skupovima, a sve s ciljem ostvarivanja zajedničke misije - očuvanja i unaprjeđenja zdravlja stanovništva.



Zavod za javno zdravstvo Federacije Bosne i Hercegovine pridružio se Crvenom križu FBiH u obilježavanju Svjetskog dana borbe protiv dijabetesa

Sarajevo, 14. 11. 2023. godine

Crveni križ Federacije Bosne i Hercegovine obilježio je Svjetski dan borbe protiv dijabetesa konferencijom u Sarajevu u utorak, 14. novembra 2023. godine. Konferencija je organizovana u sklopu projekta „Zdravo starenje u prekograničnoj oblasti – HEAL“ koja se provodi sa Crvenim krstom Vojvodine, Crvenim krstom Indije i Fondom „Evropski poslovi“ Vojvodine, a koji finansira Evropska unija.

Učestvovali su predstavnici Crvenih krstova/križeva iz BiH i inostranstva, predstavnici javnog zdravstva, sporta i osobe treće životne dobi sa područja Općine Novi Grad Sarajevo.

U projekat „Zdravo starenje u prekograničnoj oblasti – HEAL“ iz Bosne i Hercegovine su uključeni volonteri iz Orašja, Banovića, Kiseljaka, Vareša i Novog Grada koji su prošli obuke za rad sa starijim korisnicima koji su fokus

projekta te će na terenu tokom ove i naredne godine raditi na promociji zdravlja i zdravog starenja.

Oni će kroz mobilne timove biti na terenu i obilaziti starije sugrađane koji žive sami ili su



slabijeg socijalno-imovinskog stanja, pružati usluge mjerenja krvnog pritiska, šećera u krvi, holesterola, praćenja zdravstvenog stanja i učiti korisnike osnovama prve pomoći.



Počelo mjerenje kvaliteta zraka zatvorenog prostora u vrtićima u Federaciji Bosne i Hercegovine

Ljubuški/Grude, 14. i 15. 11. 2023. godine

Zavod za javno zdravstvo Federacije Bosne i Hercegovine u naredna dva mjeseca, na području Federacije Bosne i Hercegovine, mjeri kvalitet zraka zatvorenog prostora u osam vrtića na području Sarajevskog, Tuzlanskog i Zapadnohercegovačkog kantona.

Aktivnost je započeta 14. i 15. novembra 2023. godine u vrtićima u Ljubuškom i Grudama, u okviru projekta koji Zavod za javno zdravstvo Federacije Bosne i Hercegovine realizuje u saradnji sa UNICEF BiH.



Cilj je sticanje uvida u kvalitet zraka zatvorenog prostora u selektovanim vrtićima, a služice kao osnova za donošenje i provođenje relevantnih preventivnih mjera i podizanje nivoa znanja nastavnog osoblja, roditelja i djece, kao i šire vrtićke zajednice, o značaju čistog zraka u prevenciji respiratornih oboljenja.

Mjerenje kvaliteta zraka vrše predstavnice Službe za promociju zdravlja Zavoda za javno zdravstvo Federacije BiH.





Predstavnici Zavoda za javno zdravstvo Federacije BiH učestvovali na WASP radionici

Budva, 14.-16. 11. 2023. godine

Radionica “Western Balkan Strategic Partnership for Health Protection” (WASP) održana je od 14. do 16. novembra u Budvi. Na ovom događaju prisustvovali su direktor Zavoda za javno zdravstvo Federacije BiH prim. mr. sc. Siniša Skočibušić, dr. med. i voditeljica Službe za biostatistiku i informatiku, mr. sc. Šeila Cilović-Lagarija, dr. stom.

Zavod za javno zdravstvo aktivno učestvuje u WASP kao nastavak BoCo-19 projekta kroz WP4, koji se fokusira na analizu tereta bolesti (YLL, YLD i DALY indikatore) te sa izazovima u vezi sa zdravstvenim kadrom, imajući u vidu

ozbiljno opterećenje zdravstvenih sistema pandemijom COVID-19. Sastanci u okviru projekta su doprinijeli boljem kapacitiranju svih učesnika, izgradnji mreže saradnika u području javnozdravstvene metrike te je značajno unaprijeđena saradnja na publikovanju zajedničkih naučnih i stručnih publikacija.

WASP dodatno jača temeljne kapacitete javnog zdravstva na Zapadnom Balkanu, posebno u području epidemiološke pripremljenosti i odgovora, što će kao rezultat imati preciznije javnozdravstvene odluke koje će biti od koristi za cjelokupnu populaciju.



Mjerenje kvaliteta zraka zatvorenog prostora u vrtiću „Rosica“

Sarajevo, novembar 2023. godine

Posjetom vrtiću „Rosica“ u Općini Novo Sarajevo, predstavnice Službe za promociju zdravlja Zavoda za javno zdravstvo Federacije Bosne i Hercegovine nastavile su istraživanje kvaliteta zraka u vrtićima u Federaciji Bosne i Hercegovine.

Dr. Aida Vilić Švraka iz Odjela za higijenu i zdravstvenu ekologiju Službe za promociju zdravlja Zavoda za javno zdravstvo Federacije BiH rekla je da djeca u vrtićima provode dosta vremena pa je izuzetno važno da zrak u zatvorenim prostorima vrtića bude kontrolisan i kvalitetan.

Odgajateljicama/vaspitačicama u vrtiću „Rosica“ predstavnice Zavoda održale su stručna predavanja o zaštiti i unaprjeđenju zdravlje djece, o kvalitetnom zraku zatvorenog prostora i zdravoj ishrani u predškolskim ustanovama, s obzirom na to da u zatvorenom prostoru boravimo najveći dio vremena i tu uvijek, ukoliko nije adekvatna ventilacija, koncentracije polutanata mogu biti i veće nego u vanjskom prostoru. Zbog toga je važno mjerenje polutanata kako bi se pravovremeno provele eventualne zaštitne mjere.



Svjetski dan djeteta
20. novembar/studen



Predstavници Zavoda za javno zdravstvo Federacije BiH učestvovali na treningu o predviđanju i planiranju nabavke vakcina za Evropu i centralnu Aziju

Kopenhagen, 21.- 23. 11. 2023. godine

Predstavnici Zavoda za javno zdravstvo Federacije Bosne i Hercegovine, predstavnici JZU Instituta za javno zdravstvo Republike Srpske i predstavnici Ministarstva zdravlja i socijalne zaštite Republike Srpske od 21. do 23. novembra 2023. godine učestvovali su u Kopenhagenu (Danska) na UNICEF-ovom treningu o predviđanju i planiranju nabavke vakcina za Evropu i centralnu Aziju.

Trening je okupio stručnjake iz područja javnog zdravstva, zdravstvene radnike te

pružaoce zdravstvenih usluga iz Evrope i centralne Azije koji se bave planiranjem nabavke vakcina i imunizacijom. Tokom velikog broja predavanja i radionica, učesnici su dijelili znanja i iskustva iz ovog područja te raspravljali o uvođenju noviteta u proces planiranja i nabavke vakcina u budućnosti.

Zavod za javno zdravstvo Federacije BiH na ovom treningu predstavljale su dr. sc. Maja Ostojić, dr. med. i dr. Rozalija Nedić.



Održana radionica povodom Evropskog dana svjesnosti o antibioticima i Svjetske sedmice svjesnosti o antimikrobnim lijekovima

Mostar, 28. 11. 2023. godine

Povodom Evropskog dana svjesnosti o antibioticima koji je obilježen 18. novembra i Svjetske sedmice svjesnosti o antimikrobnim lijekovima koja se obilježavala od 18. do 24. novembra 2023. godine, Zavod za javno zdravstvo Federacije BiH u partnerstvu sa Federalnim ministarstvom zdravstva i Kancelarijom Svjetske zdravstvene organizacije u BiH, organizovao je radionicu namijenjenu doktorima primarne zdravstvene zaštite 28. novembra u Mostaru.



Na hibridnom događaju učestvovali su predstavnici Zavoda za javno zdravstvo Federacije BiH, Federalnog ministarstva zdravstva, Ministarstva zdravstva Hercegovačko-neretvanskog kantona, predstavnici Liječničke/ljekarske komore Hercegovačko-neretvanskog kantona/županije, predstavnici Svjetske zdravstvene organizacije, doktori primarne zdravstvene zaštite i drugi zdravstveni radnici koji doprinose očuvanju i unaprjeđenju javnog zdravlja.



Međunarodna TAIEX radionica o populacionim registrima za nezarazne bolesti

Podgorica, 29. i 30. 11. 2023. godine

Institut za javno zdravlje Crne Gore i Regionalni zdravstveni razvojni centar za nezarazne bolesti (SEEHN RHDC on NCDs) organizovali su Međunarodnu TAIEX radionicu o populacionim registrima za nezarazne bolesti u zemljama članicama Zdravstvene mreže jugoistočne Evrope (SEEHN) od 29. do 30. novembra 2023. godine u Podgorici (Crna Gora).

Preko 50 zdravstvenih profesionalaca, učesnika iz zemalja članica SEEHN-a (Albanija, Bosna i Hercegovina, Bugarska, Izrael, Moldavija, Crna Gora, Sjeverna Makedonija, Rumunija i Srbija), gosti i stručnjaci sa Kosova,

iz Turske i Evropske unije (EU), okupili su se na specijalizovanoj radionici da uporede i unaprijede znanja i iskustva u nadzoru nad nezaraznim bolestima, s posebnim fokusom na uspostavljanje i funkcionisanje populacionih registara za bolesti kao što su maligne, kardiovaskularne i dijabetes.

U ime Zavoda za javno zdravstvo Federacije BiH, na radionici su učestvovali prof. dr. sc. Aida Ramić Čatak, dr. med. - pomoćnica direktora za medicinske poslove i voditeljica Sektora javnog zdravstva i mr. sci. dr. Šeila Cilović-Lagarija, rukovodilac Službe za zdravstvenu statistiku i informatiku.



Predstavljena publikacija “Zaposleni u zdravstvenim ustanovama u Federaciji BiH”

Sarajevo/Mostar, novembar 2023. godine

Zavod za javno zdravstvo Federacije BiH pripremio je i predstavio publikaciju “Zaposleni u zdravstvenim ustanovama u Federaciji BiH”, koja ima za cilj analizu zaposlenih u zdravstvenim ustanovama u Federaciji Bosne i Hercegovine (FBiH). Dokument sadrži pregled zaposlenog zdravstvenog kadra, zdravstvenih saradnika i nezdravstvenih radnika/administrativnog i tehničkog osoblja/u javnim zdravstvenim ustanovama u Federaciji BiH.

S obzirom na to da su zdravstveni radnici temelj svakog zdravstvenog sistema te da se primjećuje trend starenja zdravstvenih radnika - kako u Federaciji BiH, tako i drugim

zemljama u regiji, Regionalna kancelarija Svjetske zdravstvene organizacije za Evropu usvojila je Bukurešku deklaraciju o radnoj snazi u zdravstvu 22. i 23. marta 2023. godine, s ciljem unaprjeđenja planiranja zdravstvenih radnika te poboljšanje uslova rada, dok je u oktobru 2023. godine usvojen “Framework for action on the health and care workforce in the WHO European Region 2023–2030”.

Publikaciju “Zaposleni u zdravstvenim ustanovama u Federaciji BiH” možete pronaći na web stranici Zavoda za javno zdravstvo Federacije BiH.



Obilježen Svjetski dan borbe protiv HIV/AIDS-a u Federaciji Bosne i Hercegovine

Mostar, 1. 12. 2023. godine

Zavod za javno zdravstvo Federacije Bosne i Hercegovine, u saradnji sa Sveučilišnom kliničkom bolnicom Mostar, organizovao je niz aktivnosti u Mostaru kojima je obilježen 1. decembar – Svjetski dan borbe protiv HIV/AIDS-a. Na promotivnom mjestu u Trgovačko poslovnom centru Mepas Mall u Mostaru organizovano je dobrovoljno, povjerljivo i besplatno testiranje na HIV te hepatitis B i C.

O važnosti prevencije i tretmana najbolje govori podatak da je protekloj godini u Federaciji Bosne i Hercegovine povećan broj pacijenata koji su inficirani HIV-om, a porast

bilježimo i posljednjih nekoliko godina te je nužno posvetiti više pažnje ovom, još uvijek stigmatizovanom, javnozdravstvenom problemu.

U sklopu obilježavanja Svjetskog dana borbe protiv HIV/AIDS-a, za studente u Mostaru organizovano je edukativno predavanje o HIV-u i AIDS-a u amfiteatru Antun Branko Šimić Filozofskog fakulteta Sveučilišta u Mostaru, koje su održale dr. Ivana Talić Drlje iz Transfuzijskog centra SKB Mostar i dr. Rozalija Nedić iz Službe za epidemiologiju zaraznih bolesti Zavoda za javno zdravstvo Federacije BiH.



Međunarodni dan osoba s invaliditetom
3. decembar/prosinac





Simpozij „Pneumokokna bolest i imunizacija protiv pneumokokne bolesti“

Sarajevo, 6. 12. 2023. godine

Odjeljenje za nauku, nastavu i poboljšanje kvaliteta JU Opće bolnice „Prim. dr. Abdulah Nakaš“ i Centar za nastavnu i naučno-istraživačku djelatnost JU Dom zdravlja Kantona Sarajevo pod pokroviteljstvom Ministarstva zdravstva Kantona Sarajevo, organizovali su simpozijum naziva „Pneumokokna bolest i imunizacija protiv pneumokokne bolesti“ 6. decembra 2023. godine u JU Opća bolnica „Prim. dr. Abdulah Nakaš“ Sarajevo.

Kroz niz predavanja i diskusija, ugledni stručnjaci iz Bosne i Hercegovine prezentovali su najnovija saznanja i iskustva o pneumokoknoj bolesti, izazovima i terapijskim opcijama u njenom liječenju, a posebno su ukazali na važnost prevencije – imunizacije protiv pneumokokne bolesti djece i odraslih osoba.

U ime Zavoda za javno zdravstvo Federacije Bosne i Hercegovine skup je pozdravila prof. dr. sc. Aida Ramić Čatak, dr. med. - pomoćnica

direktora za medicinske poslove i voditeljica Sektora javnog zdravstva. Prisutnima je održala predavanje „Komunikacija u promociji imunizacije protiv pneumokokne bolesti i uloga javnog zdravstva“, kojim je ukazala na nužnost unaprjeđenja komunikacije zdravstvenih radnika, interpersonalne i komunikacije s javnošću.

Na Simpozijumu su učestvovali i predstavnici Službe za epidemiologiju zaraznih bolesti, Ambulante za nadzor zdravstvenog stanja te glasnogovornik Zavoda za javno zdravstvo Federacije BiH.

Streptococcus pneumoniae (pneumokok) učestali je uzročnik pneumokokne bolesti (meningitis, pneumonija i bakterijemija/sepsa). Vakcinacija je efikasna i štiti od teških oblika pneumokokne bolesti te je važno uvesti je u program obavezne imunizacije, zaključak je simpozijuma.



Završena mjerenja kvaliteta zraka zatvorenog prostora u vrtićima u Federaciji Bosne i Hercegovine

Kladanj, decembar 2023. godine

Mjerenjem kvaliteta zraka u vrtiću „Edina Čamdžić“ u Kladnju (Tuzlanski kanton), predstavnice Odjela za higijenu i zdravstvenu ekologiju Službe za promociju zdravlja Zavoda za javno zdravstvo FBiH završile su Pilot program

u selektovanim vrtićima u Federaciji Bosne i Hercegovine. Odgajateljicama/vaspitačicama u vrtiću „Edina Čamdžić“ predstavnice Zavoda održale su stručna predavanja o zaštiti i unaprjeđenju zdravlje djece, o kvalitetnom zraku

zatvorenog prostora i zdravoj ishrani u predškolskim ustanovama.

Radionici je, osim osoblja vrtića na čelu sa direktoricom Dalidom Salihović, prisustvovao i podršku projektu pružio načelnik Općine Kladanj Jusuf Čakunović.

Kako je projekat koincidirao sa Danom cje-

lovitih žitarica, promotivnom kampanjom koju Zavod za javno zdravstvo obilježava u saradnji sa vrtićima, iskorištena je prilika da se vrtići upoznaju sa kampanjom te su im prezentovani i podijeljeni promotivni materijali koje mogu koristiti u radu sa djecom i roditeljima.



Održana Peta škola imunizacije u Federaciji Bosne i Hercegovine

Sarajevo, 14.- 15. 12. 2023. godine

Kancelarija Svjetske zdravstvene organizacije u Bosni i Hercegovini, u partnerstvu sa Federalnim ministarstvom zdravstva, Zavodom za

javno zdravstvo Federacije Bosne i Hercegovine i JU Dom zdravlja Kantona Sarajevo i uz podršku Evropske unije organizovala je Petu



školu imunizacije u Federaciji Bosne i Hercegovine koja je održana 14. i 15. decembra 2023. godine u Sarajevu.

“Komunikacija u provođenju imunizacije” bila je glavna tema dvodnevnog hibridnog skupa na kojem se govorilo o redovnoj imunizaciji u Federaciji Bosne i Hercegovine, uvođenju imunizacije protiv HPV infekcije u Federaciji Bosne i Hercegovine, o imunizaciji protiv pneumokokne bolesti, vakcinaciji protiv COVID-19 i drugim temama vezanim uz imunizaciju.

Učestvovali su zdravstveni radnici koji rade na imunizaciji u Federaciji Bosne i Hercegovine



te domaći i međunarodni stručnjaci iz ovih oblasti koji su istakli važnost imunizacije za smanjenje obolijevanja i umiranja od zaraznih bolesti, ali i potrebu da se ulože dodatni naponi kako bi se unaprijedio proces imunizacije, posebno strategije naknadnog vakcinisanja i vođenja evidencija o imunizaciji.

Na skupu su, pored direktora Zavoda za javno zdravstvo Federacije BiH prim. mr. sc. Siniše Skočibušića, dr. med. govorile i prof. dr. sc. Aida Ramić-Čatak, dr. med. - pomoćnica direktora za medicinske poslove te dr. Rozalija Nedić iz Službe za epidemiologiju zaraznih bolesti ovog Zavoda.



Zahvalnica Fakulteta zdravstvenih studija UNSA Zavodu za javno zdravstvo Federacije BiH

Sarajevo, 15. 12. 2023. godine

Fakultet zdravstvenih studija Univerziteta u Sarajevu je povodom obilježavanja 50. godišnjice postojanja organizovao Svečanu akademiju koja je održana u petak, 15. decembra 2023. godine u Gradskoj vijećnici Sarajevo. Tom prilikom su uručena priznanja i zahvalnice ustanovama i pojedincima koji su doprinijeli radu i razvoju Fakulteta. Zahvalnica je uručena i Zavodu za javno zdravstvo Federacije Bosne i Hercegovine za stručnu i naučnu saradnju, a primila ju je pomoćnica direktora za medicinske poslove prof. dr. sc. Aida Ramić Čatak, dr. med. - redovna profesorica na

ovom fakultetu.

Prof. Ramić se zahvalila na priznanju ističući da Zavod ostaje posvećen razvijanju daljnje uspješne saradnje sa Fakultetom zdravstvenih studija Univerziteta u Sarajevu na području edukacije zdravstvenih radnika i zajedničkom naučno-istraživačkom radu, podsjećajući prisutne da Zavod za javno zdravstvo Federacije Bosne i Hercegovine svoju uspješnu saradnju i partnerstvo ostvaruje dugi niz godina i sa drugim fakultetima i školama zdravstvenih usmjerenja u Federaciji Bosne i Hercegovine.



Novogodišnje i božićne zakuske za kraj uspješne godine

Sarajevo/Mostar, 19. i 20. 12. 2023. godine

Direktor Zavoda za javno zdravstvo Federacije Bosne i Hercegovine prim. mr. sc. Siniša Skočibušić, dr. med. organizovao je novogodišnje i božićne zakuske za sve uposlenike obje organizacione jedinice Zavoda za javno zdravstvo Federacije BiH 19. i 20. decembra 2023. u Sarajevu i Mostaru.

Zaposlenima u Kabinetu direktora, Sektoru javnog zdravstva, Sektoru zdravstvene ekologije i Ambulante za nadzor zdravstvenog stanja, sa pripadajućim službama i odjelima, direktor Zavoda dr. Skočibušić se zahvalio na dolasku te u prigodnom govoru naglasio da

je iza Zavoda još jedna uspješna godina u kojoj su ostvareni najvažniji ciljevi i realizovane brojne aktivnosti i projekti.

Istakao je da je Zavod sada puno vidljiviji kao institucija i da ga donosioci odluka i opšta javnost mnogo bolje prepoznaju, kao i njegove mnogobrojne redovne aktivnosti te dodao da je u narednom periodu u planu unaprjeđenje saradnje sa Vladom Federacije Bosne i Hercegovine, Federalnim ministarstvom zdravstva i drugim domaćim i međunarodnim institucijama, organizacijama i medijima.



U Federaciji Bosne i Hercegovine potvrđeni prvi slučajevi gripe u sezoni 2023./2024.

Kanton Sarajevo, decembar 2023. godine

U referentnom laboratoriju za gripu u Federaciji Bosne i Hercegovine potvrđeni su prvi slučajevi sezonske gripe u sezoni

2023./2024. U pitanju su dva uzorka pozitivna na virus gripe, jedan na virus gripe tip A i drugi na tip B, uzeti od pacijenata na



mjestu za sentinel nadzor u Kantonu Sarajevo. Nadzor nad gripom u Federaciji BiH je, kao i svake sezone, započeo u desetom mjesecu (40. sedmica).

Aktivnost gripe je niska do srednje visoka u zemljama Evropske regije, a detektovan je većinom virus gripe tip A, dominantno podtip A(H1)pdm09.

Zavod za javno zdravstvo Federacije Bosne i Hercegovine je za ovu sezonu osigurao 7000 doza vakcina protiv gripe prvenstveno za zdravstvene radnike, a dio doza je namijenjen

i za vakcinaciju stanovništva. Vakcinacija protiv gripe provodi se u epidemiološkim ambulantama Zavoda za javno zdravstvo Federacije BiH u Sarajevu i Mostaru.



Predstavljena publikacija “Povrede registrovane u Federaciji Bosne i Hercegovine”

Sarajevo/Mostar, decembar 2023. godine

Zavod za javno zdravstvo Federacije Bosne i Hercegovine pripremio je i predstavio publikaciju “Povrede registrovane u Federaciji Bosne i Hercegovine” koja detaljno istražuje mortalitet i morbiditet povreda u Federaciji BiH, pružajući uvid u različite aspekte prikupljanja podataka, karakteristike povreda i njihove posljedice. Ovi podaci mogu poslužiti kao osnova za daljnja istraživanja, planiranje intervencija i unaprjeđenje javnog zdravlja.



Publikacija pruža detaljne prikaze povreda registrovanih u primarnoj zdravstvenoj zaštiti. Uključuje informacije o vrsti povreda, spolu, starosnim grupama (djeca do pet godina, školska djeca i mladi, odraslo stanovništvo i stariji od 65 godina) kao i o mjestu nastanka povreda. Publikacija pruža uvid u distribuciju i karakteristike povreda unutar populacije za period od 2004. do 2021. godine.

Analize smrtnosti povezane s povredama kao što su saobraćajne nesreće, samoubistva, napadi i ubistva također su prikazane u publikaciji. Ove analize daju dublji uvid u ozbiljnost i posljedice povreda, pomažući identifikaciju područja gdje su potrebne intervencije radi smanjenja smrtnosti usljed povreda koje predstavljaju veliki javnozdravstveni problem, s obzirom na to da dovode do velike invalidnosti, nesposobnosti i smrtnosti stanovništva Federacije BiH.

Glavni i odgovorni urednik
prim. mr. sc. Siniša Skočibušić, dr. med.

Zamjenica glavnog i odgovornog urednika
Elvedina Žiga, dr. med.

Lektor
Maja Kojović

Dizajn
FRAM-ZIRAL d.o.o., Mostar

Izdavač
Zavod za javno zdravstvo
Federacije Bosne i Hercegovine

ISSN
2831-1604

Mjesto i godina izdavanja
Sarajevo/Mostar, 2023.

ZAVOD ZA JAVNO ZDRAVSTVO FEDERACIJE BOSNE I HERCEGOVINE

Organizacijska jedinica u Mostaru

📍 Vukovarska 46
☎ +387 36 382 101
✉ kabinet.mo@zzjfbih.ba

Organizacijska jedinica u Sarajevu

📍 Maršala Tita 9
☎ +387 33 564 601
✉ kabinet.sa@zzjfbih.ba

